

## 10-§. Axborotni yoritib berish

58. Moliyaviy hisobotda quyidagi axborotlar yoritib berilishi lozim:

a) asosiy vositalarning harakatini: kiritilishi, chiqib ketishi, boshlang'ich qiymatning o'zgarishi, o'zgarish sabablarini hisobga olgan holda ularning har bir turi bo'yicha hisobot davrining boshidagi va oxiridagi boshlang'ich (qayta tiklash) qiymati;

b) asosiy vositalarning har bir turi bo'yicha amortizasiya hisoblashda: amortizasiya hisoblashning foydalaniladigan usuli, amortizasiyalanadigan asosiy vositalarning hisobot davri boshidagi va oxiridagi boshlang'ich yoki joriy qiymati, hisobot davri boshidagi va oxiridagi jamg'arilgan amortizasiya summasi;

v) qayta baholashni o'tkazishda: asosiy vositalar har bir turining hisobot davri boshidagi va oxiridagi joriy qiymati, qayta baholashni o'tkazishning asoslanganligi va davriyligi, qayta baholashni o'tkazish sanasi, qayta baholashni o'tkazish usuli.

59. Bundan tashqari, moliyaviy hisobotdan foydalanuvchilar uchun hisobot davri oxirida quyidagilar to'g'risidagi axborotni ham ochib berish lozim:

a) vaqtinchalik foydalanilmayotgan asosiy vositalarning boshlang'ich (qayta tiklash) yoki joriy qiymati to'g'risida;

b) foydalanishda bo'lgan, amortizasiyasi to'liq hisoblangan asosiy vositalarning boshlang'ich (qayta tiklash) yoki joriy qiymati to'g'risida;

v) majburiyatlar bo'yicha kafolat sifatida garovga berilgan asosiy vositalarga mulk huquqining mavjudligi va cheklanganligi to'g'risida;

g) asosiy vositalarni xarid qilish bo'yicha to'lanmagan majburiyatlar to'g'risida;

d) hisobot davri oxiridagi tugallanmagan qurilish qiymati to'g'risida;

ye) davlat ro'yxatidan o'tkazish jarayonida bo'lgan, foydalanishga qabul qilingan va haqiqatda foydalanilayotgan ko'chmas mulk ob'yektlari to'g'risida;

j) maqsadli moliyalashtirish hisobidan olingan asosiy vositalarning boshlang'ich qiymati, qoldiq qiymati va baholash usuli to'g'risida;

z) foydalanishdan chiqarilgan, biroq keyinchalik ularni sotish maqsadida asosiy vositalar tarkibida hisobda turgan asosiy vositalarning ayrim turlarining hisobot davri oxiridagi qiymati to'g'risida;

i) asosiy vositalarni tiklashga doir xarajatlar bilan bog'liq bo'lgan hisob siyosati to'g'risida.